



## RICORDI DI MARIA TERRILE VIETZ

Enzo D'Amore ci ha inviato questa prefazione di Maria mai pubblicata, per un libro della Nuova Editrice Genovese.

Camminn-o un pö imbarlugâ tra tutta quella gente ch'a te ronsa smaniosa de svenâse e stacche da quelle palanche suspiaê tutto l'anno pe poi straggiale inte n'ette, in cento cose o dexidei che servan solo a soddisfâ e nostre ambission.

Penso ai figgieu d'ancheu, sciavi de questi "piccoli ordigni elettronici" de urtima creassion, che camminan pe-e strade comme tanti robot, co-e cuffie inte öege e i euggi fissi in sce quelli quadratin luminosi: assenti, indifferenti e sorviatutto soli, in t'un loro mondo che no han bezeugno de dividde con nisciun... Che tristessa!

Son assatâ de botto da n'onda de regordi, a mæ infansia, i vëgi sestè de Portoia, Pontexello, Caroggiu Drïto, o Cian (S. Andria), a Mænn-a... un viägio a l'incontraio quande o tempo o scoriva inte n'âtra dimenscion, quande a pövea gente a spendeiva i dinæ co-o contagocçe, missi in conto co-i propri "bilanci"; un solo streppa a-a regola: 'na demoa pe-i figgieu! Ma ben pochi alôa andavan a accattâ a-a "Fata dei Bambini", o loro fornitò o l'ëa in Ciassa Neuva (ancô Matteotti) che, da solitaio dominio di còmbi, a diventava a ciassa di banchetti, 'na baraonda de cöse e gente dove ti poeivi trovâ de tutto: demöe, statuete pe-o preseppio, borse, partefeuggi, addobbi per l'ërbo de Natale, cassoule, tondi, guanti, ecc. e cosci ti poeivi contentâ anche i dexidei da famiggia a bon prexo.

L'ërbo de pin o l'ëa troppo cào? e alloa s'addobbava 'na bella ramma d'oufeuggio con de çetroin, mandarin, quar-

che mei, un pö de trillo indöu e sotta, ascoso, s'attrovaiva o regalo do Bambin Gexù: cuxinette de lamma, bambocette de seréuia, balloin, lapis coloræ... poca speisa e cheu contento.

Ma alôa i figgieu ëan ancon "innocenti", un pö ascemellæ, credeivan veramente ai regalli do Bambin; poi a guæra a l'ha destruto tutto, anche i nostri valori e e nostre convinsoin. E cosci e nostre innocue böxie, figgieu che nascian sotta o côi o che i porta a cicogna in to becco e anche o Bambin Gesù, son andæti a fase benedi!

In cangio, da-o Polo Nord, l'ë arrivòu Babbo Natale co-a seu slitta càrega de regalli da spantegâ abbrettio. I figgieu se son ammarottii d'aspertixe e l'innocensa a l'ë sparia. Ma e preteise no!

En finii anche i tempi quando e donne zeneixi, pe sarvâ l'orgoglio e asconde a loro miseia, accattavan i colli de polastro e lasciavan pende in mostra e teste foua de sporte, pe fâ crede d'avei accattòu o pitto, oppure metteivan e ciumme in çima a-o bolacco da ruménta cosci che e vexinn-e... vedessan. Foscia ancô a peu pâi 'na cösa stupida ma, vista co-i euggi giusti, a l'ëa 'na difeisa ä dignitæ da propria miseia, ch'a no domandava mai ninte a nisciun, 'na qualitatè de gente de questa tæra avara ch'a no l'ha ricchesse ma a l'ë giosa comme na gatta.

E a voei savèi 'na cösa? Son contenta d'ëse vëgia! D'avei visciuo quelli tempi de miseia perché son arrestâ ricca drento, e a cosa ciù bella a l'ë che riesciu ancon a seugnâ!